

ZAPISNIK
O RADU 26. RADNE SJEDNICE SKUPŠTINE KANTONA SARAJEVO ODRŽANE
14.11.2025.GODINE SA POČETKOM RADA U 10,00 SATI

Dvadeset i šestu radnu sjednicu Skupštine Kantona Sarajevo otvorio je predsjedavajući Elvedin Okerić (u daljem tekstu predsjedavajući).

Nakon intoniranja državne himne, predsjedavajući je pozvao zastupnice i zastupnike da odaju počast pripadnicima Armije R BiH i MUP-a R BiH koji su dali svoje živote u odbrani od agresije na Bosnu i Hercegovinu, svako na svoj način.

Potom je uputio pozdrave zastupnicama i zastupnicima u Skupštini Kantona Sarajevo, članovima Vlade Kantona Sarajevo, svim prisutnim u sali, kao i predstavnicima medija koji prate rad sjednice.

Sjednici je prilikom otvaranja prisustvovalo 19 zastupnica i zastupnika, dok su se tokom sjednice priključili i ostali zastupnici. Izostanak sa ove sjednice opravdali su zastupnica Sebija Izetbegović i zastupnik Albin Zuhrić. Sjednici nije prisustvovala zastupnica Vildana Bešlija.

U skladu s naprijed iznesenim, prisustvo zastupnika 26. Radnoj sjednici je bilo sljedeće:

SDA - STRANKA DEMOKRATSKE AKCIJE

1. Dević Mahir
2. Kalem Adi
3. Kapidžić Faruk
4. Selmanović Faruk
5. Viteškić Smiljana
6. Zahiragić Haris

POLITIČKA ORGANIZACIJA "NAROD I PRAVDA"

1. Čampara Aljoša
2. Kristić Danijela
3. Mehmedagić Mersiha
4. Okerić Elvedin
5. Pobrić Rusmir
6. Vreto Elvis

SOCIJALDEMOKRATSKA PARTIJA BOSNE I HERCEGOVINE

1. Avdić Samir
2. Čičić Davor
3. Kapo Belma
4. Pekić Jelena
5. Petrović Kristina
6. Vikić – Musić Vedrana

POLITIČKA ORGANIZACIJA GRAĐANA "NAŠA STRANKA"

1. Handžić Vibor
2. Klarić Sanela
3. Melank Miomirka

STRANKA ZA BOSNU I HERCEGOVINU

1. Bandić Muamer
2. Gavrankapetanović-Smailbegović Fatima
3. Šaljić Jasmin

DEMOKRATSKA FRONTA

1. Hašimbegović Marijela
2. Pilav Ilijaz
3. Vujović Vedrana

SAMOSTALNI ZASTUPNICI

1. Hodžić Admela
2. Gaković Elza
3. Lemezan Redžo
4. Memić Arijana
5. Adna Mesihović

Potom se prešlo na utvrđivanje dnevnog reda sjednice.

Predsjedavajući je naveo da je na osnovu člana 74. Poslovnika Skupštine Kantona Sarajevo, Kollegij Skupštine Kantona Sarajevo, na sjednici održanoj 05.11.2025.godine, utvrdio je Prijedlog dnevnog reda današnje, 26. Radne sjednice.

Nakon čitanja dnevnog reda, predsjedavajući je pozvao zastupnike da se izjasne o istom.

Na osnovu rezultata glasanja, konstatovano je da je Dnevni red 26. Radne sjednice Skupštine Kantona Sarajevo usvojen jednoglasno (s 19 glasova „za“), i isti glasi:

1. Poslanička/zastupnička pitanja inicijative i odgovori;
2. Nacrt Budžeta Kantona Sarajevo za 2026. godinu;
3. Nacrt Zakona o izvršavanju Budžeta Kantona Sarajevo za 2026. godinu;
4. Prijedlog Odluke o standardima i kriterijima za imenovanje na poziciju članova Nezavisnog odbora Skupštine Kantona Sarajevo;
5. Prijedlog Odluke o izmjenama Odluke o izboru predsjedavajućih, zamjenika predsjedavajućih i članova stalnih radnih tijela Skupštine Kantona Sarajevo;
6. Prijedlog Odluke o proširenju djelatnosti Javne ustanove Srednja škola za tekstil, kožu i dizajn Sarajevo na djelatnost obrazovanja odraslih;
7. Prijedlog Odluke o proširenju djelatnosti Javne ustanove Srednja zubotehnička škola Sarajevo na djelatnost obrazovanja odraslih;
8. Izvještaj o radu Fonda Kantona Sarajevo za stipendiranje i školovanje djece boraca, poginulih boraca i poginulih civila- žrtava rata „IKRE“ sa izvještajem o finansijskom poslovanju za 2024. godinu.

Predsjedavajući je napomenuo da su zastupnici, također, uz poziv za sjednicu dobili i sljedeći informativni materijal:

- Informacija o stanju kriminaliteta, javnog reda i mira i sigurnosti saobraćaja na području Kantona Sarajevo za mjesec avgust 2025. godine;
- Informacija o stanju kriminaliteta, javnog reda i mira i sigurnosti saobraćaja na području Kantona Sarajevo za mjesec septembar 2025. godine;
- Izvještaj o razvoju Kantona Sarajevo za 2024. godinu;
- Izvještaj o korištenju sredstava Tekuće rezerve iz Budžeta Kantona Sarajevo za period od 01.01. do 30.06.2025. godine.

TOK SJEDNICE

Realizacija prve tačke dnevnog reda počela je u 09 sati i 30 minute.

Na inicijativu zastupnika Faruka Selmanovića odata je počast svim žrtvama požara u Staračkom domu u Tuzli.

AD – 1.

POSLANIČKA/ZASTUPNIČKA PITANJA, INICIJATIVE I ODGOVORI

Predsjedavajući je otvorio tačku dnevnog reda i dao riječ prvom prijavljenom zastupniku.

Zastupnica Fatima Gavrankapetanović-Smailbegović je podnijela sljedeće (citiramo):
„Ja danas podnosim inicijativu ministru zdravstva dr. Enisu Hasanoviću za hitno rješavanje liste čekanja reumatoloških pacijenata na biološku terapiju u Kantonu Sarajevo. U Kantonu Sarajevo se trenutno nalazi oko 100 reumatoloških pacijenata koji su na listi čekanja za biološku terapiju. Radi se o osobama koje boluju od teških hroničnih autoimunih bolesti. Biološka terapija predstavlja standardni oblik liječenja ovih bolesti koji usporava napredovanje bolesti, sprječava deformacije zglobova i invaliditet te omogućava očuvanje radne sposobnosti i dostojanstven život pacijenata. Posebno zabrinjava činjenica da tokom 2025. godine ni jedan novi pacijent u Kantonu Sarajevo nije stavljen na program biološke terapije, iako je broj oboljelih u stalnom porastu, a indikacija za terapiju su medicinski jasno definirane. Ovakva situacija dovela je do potpunog zastoja u liječenju novih pacijenata. Zbog svega toga upućujem inicijativu da se odobre dodatna sredstva Zavodu zdravstvenog osiguranja Kantona Sarajevo radi uključivanja svih pacijenata na listu čekanja za biološku terapiju i da se u okviru Budžeta Zavoda zdravstvenog osiguranja za 2026. godinu planira budžetska sredstva stavka za liječenje reumatoloških bolesti biološkom terapijom. Također, imam inicijativu za ministra zdravstva, a to je da se osigura privremeno financiranje terapije lijekom Sota tercept za pacijente sa plućnom arterijskom hipertenzijom u Kantonu Sarajevo. Plućna arterijska hipertenzija rijetka je, hronična i progresivna bolest koja dovodi do visokog mortaliteta ukoliko se ne liječi adekvatno i pravovremeno. Terapijske mogućnosti su ograničene, a uvođenje inovativnih lijekova značajno produžava i poboljšava kvalitet života. U Kantonu Sarajevo trenutno je registrovano 10 pacijenata sa plućnom arterijskom hipertenzijom, od kojih 4 imaju kliničku indikaciju za početak terapije sa ovim lijekom. Riječ je o inovativnom lijeku čija su učinkovitost i sigurnost potvrđene su u međunarodnim kliničkim ispitivanjima, a koji je odobren od strane Agencije za lijekove i medicinska sredstva Bosne i Hercegovine u septembru 2025. godine. Budući da ovaj lijek još nije uvršten na Listu lijekova Fonda solidarnosti Federacije Bosne i Hercegovine, pacijenti iz Kantona Sarajevo trenutno nemaju mogućnost pristupa ovoj terapiji, iako postoji jasna medicinska indikacija. Zbog toga upućujem inicijativu Ministarstvu zdravstva Kantona Sarajevo i Zavodu zdravstvenog osiguranja Kantona Sarajevo da razmotri mogućnost privremenog financiranja ili sufinansiranje terapijom ovim lijekom za 4 pacijenta s plućnom arterijskom hipertenzijom do konačne odluke o njegovom

uvrštavanju na Federalnu listu lijekova. Također, imam pitanje za ministra zdravstva s obzirom da sam inicijativu u vezi ovoga podnijela prije 2 do 3 mjeseca, da li ste razmatrali mogućnost proširenja postojećih terapijskih protokola kroz uvrštenje lijeka Anakira u kliničku praksu u slučajevima kada za to postoje medicinske indikacije? Nažalost, i dalje troje djece u Kantonu Sarajevo koji boluju od teških oblika reumatskih bolesti, koristi terapiju ovim lijekom, a njihovi roditelji su primorani sami financirati njihovo liječenje što iznosi 2900 konvertibilnih maraka.“

Zastupnica Admela Hodžić je podnijela sljedeće (citiramo): „Prvo moje pitanje upućeno je ministru komunalne privrede da nam odgovori, tražim usmeni odgovor, kada će raspisati javni poziv za doplatu sredstava mladima koji su ostvarili pravo na subvenciju i sredstva za ovaj regulisanje svog prvog stambenog pitanja iz 2023. godine? Moja inicijativa je upućena Vladi Kantona Sarajevo i Ministarstvu za odgoj i obrazovanje Kantona Sarajevo da se poništi konkursnu proceduru za prijem radnika u javnim ustanovama, osnovnim i srednjim školama u Kantonu Sarajevo. Javni konkurs za prijem radnika u osnovnim i srednjim školama kao javnim ustanovama na području Kantona Sarajevo objavljen je 27. 10. 2025. godine na web stranici Ministarstva. Obrazloženje: podnosim ovu inicijativu iz razloga što su mi se obratili, što mi se obratio veliki broj nastavnika, djece naših boraca, koji su aplicirali na konkurs. Pritužba im se odnosi na to da im digitalni pravilnik nije omogućio da koriste svoja zakonska prava kao pripadnici boračke populacije na način da im je onemogućeno da unesu periode kada su im članovi porodice bili pripadnici Armije Republike Bosne i Hercegovine ako je bilo više navedenih perioda u uvjerenjima o učešću u Armiji. S obzirom na tu činjenicu da je tu nepravdu nemoguće ispraviti u toku konkursa, a riječ je o djeci najzaslužnijih što imamo našu domovinu, podnosim inicijativu da se javni konkurs za prijem radnika u osnovnim i srednjim školama poništi. Sindikat srednjeg i visokog obrazovanja, odgoja, nauke i kulture Bosne i Hercegovine, Kantonalni odbor Kantona Sarajevo, također mi je poslao dopis sa zahtjevom za poništenje javnog konkursa, u kojem također navode propuste na štetu boračke populacije, druge ozbiljne primjedbe kojima argumentirano dovodi u pitanje zakonitost ovakve procedure konkursa. Zabrinjavajući je navod da se nezakonitim prijenosom ovlasti na članove komisije u školama iste dovodi u poziciju da radi mimo nadležnosti koji im propisuje pravilnik, što ih može dovesti u nezgodnu situaciju u slučaju izvjesnih sudskih epiloga. Također, nastavnici su mi dostavili zahtjev Samostalnih sindikata osnovnog obrazovanja i odgoja Federacije Bosne i Hercegovine, Kantonalnog odbora Sindikata osnovnog obrazovanja i odgoja Kantona Sarajevo, kojim traže poništenje javnog konkursa sa prijem radnika u osnovnim školama jer sistem nije pokazao jedan problem prilikom apliciranja na konkurs, već se radi o više nedostataka u sistemu. Ovaj Sindikat je zaprimio mnogo dopisa od strane kandidata koji su aplicirali na javni konkurs za prijem radnika u osnovnim školama na području Kantona Sarajevo, a čiji se prijava vršila putem modula. Kandidati su svoje nezadovoljstvo iskazali i ukazali na nefunkcionalnost elektronskog sistema prijema radnika, posebno ističu da će zbog ovakvog načina prijema radnika biti oštećeni jer će biti bez posla, a sve iz razloga jer im dokumentacija nije uredno verifikovana, ukazuje da sistem nije praktičan i provodiv.“

Zastupnica Belma Kapo je podnijela sljedeće (citiramo): „U ime zastupnice Jelene Pekić i u moje ime postavljam pitanja za Klinički centar Univerziteta u Sarajevu. Da li imate uslugu medicinski potpomognute oplodnje? Ako nemate, zašto nemate i šta je potrebno da ovu uslugu osigurate za sve pacijente u Bosni i Hercegovini? Naime, svjedoci smo ovih dana, vrlo dramatične situacije sa jednom privatnom klinkom u Sarajevu, koja se bavila procesom vantjelesne oplodnje, a koja je imala ugovor sa Fondom solidarnosti Zavoda zdravstvenog osiguranja i reosiguranja Federacije Bosne i Hercegovine. Dogodilo se da je ta privatna poliklinika zatvorila vrata pacijentima i da je, prema izjavama korisnika, više od četiristo embriona ostalo u njenim prostorijama. Izuzetno cijenimo stručnost i mogućnost koje privatne klinike mogu da pruže pacijentima, ali imperativ je da svaka zdravstvena usluga, pa i IVF, bude

dostupna kroz javni zdravstveni sistem. Zdravlje i mogućnost roditeljstva ne smiju zavisiti isključivo od toga ko može priuštiti, a ko ne može privatni tretman. Ovakvi incidenti nam jasno pokazuju da se ne možemo isključivo osloniti na privatne klinike i da ne samo sa aspekta troškova, već i sigurnost i prava pacijenata. Zato smatramo da uvođenje usluge medicinski potpomognute oplodnje u javni zdravstveni centar poput Kliničkog centra Univerziteta u Sarajevu je izuzetno ključno da svaka osoba u Bosni i Hercegovini, bez obzira na finansijsku mogućnost, može imati pristup kvalitetnoj, pouzdanoj i sigurnoj usluzi liječenja neplodnosti. Država koja želi imati budućnost mora imati javni sistem koji može pružiti najosjetljivije zdravstvene usluge.“

Zastupnica Smiljana Viteškić je podnijela sljedeće (citiramo): „Ja za današnju sjednicu imam jedno pitanje i jednu inicijativu. Pitanje upućujem ministru zdravstva i na njega želim pisani odgovor. Znači, 28.09.2022. počelo je utopljavanje centralnog objekta Doma zdravlja Ilidža, čime je on postao funkcionalniji i estetski ljepši. Sredstva od jednog miliona konvertibilnih maraka su obezbijedena kreditom Europske banke za obnovu i razvoj u sklopu projekta energetske efikasnosti. Inicijative su postojale više godina prije, što u Skupštini Kantona Sarajevo, što u Općinskom vijeću Ilidža. Početkom 2025. godine radovi su završeni, ali samo na dijelu objekta. Pitanje: da li je bio plan projekat da se utopli cijeli centralni objekat Doma zdravlja Ilidža? Da li će se dio zgrade koji je ostao utopiti s obzirom da su tu smještene značajne službe primarne zdravstvene zaštite, dispanzer za plućne bolesti, laboratorijska služba, hitna medicinska pomoć, apoteka, ultrazvučna i rendgen dijagnostika? Da li iz kredita iz kojeg su financirani dosadašnji radovi ima sredstava za utopljavanje ovog dijela zgrade? Ako nema da li je u Ministarstvu zdravstva, da li su u Ministarstvu zdravstva planirana sredstva da se ovaj posao završi? Za sada ovaj dio zgrade izgleda kao pomoćni objekat Doma zdravlja. Moja inicijativa odnosi se na kolektor Trnovo. Podnosim inicijativu da se u Budžetu Kantona Sarajevo za 2026 godinu izdvoje sredstva u iznosu od 200 000 konvertibilnih maraka za održavanje postrojenja za pročišćavanje otpadnih voda Trnovo. Sporazum o definisanju statusa postrojenja za pročišćavanje otpadnih voda Trnovo potpisan je u maju 2018 godina između Kantona Sarajevo, Ministarstva komunalne privrede i infrastrukturi, tako se tada zvalo Ministarstvo, Komunalnog javnog preduzeća ViK i Općine Trnovo. Predviđeno je da pomenuti prečištač otpadnih voda preuzme Javno komunalno preduzeće Trnovo, uz obavezu Ministarstva da će nastaviti financiranje rada postrojenja. Iznos financiranja u 2018. godini iznosio je 150 000 konvertibilnih maraka. Obzirom na inflatorna kretanja, poskupljenje troškova energije i radne snage i troškova održavanja, smatramo da je za nesmetan rad postrojenja neophodno u Budžetu Kantona Sarajevo za 2026. godinu osigurati minimalno 200 000 konvertibilnih maraka. Obzirom da se na postrojenju vrši prečišćavanje otpadnih voda koje dolaze sa teritorije RS Trnovo, Javno komunalno preduzeće Trnovo ne ostvaruje nikakav finansijski prihod od odvođenja i pročišćavanja fekalne kanalizacije. Javno komunalno preduzeće Trnovo nije u mogućnosti nije u mogućnosti financirati rad, stoga je potrebno da se ova sredstva odobre za rad ovog postrojenja.“

Zastupnica Vedrana Vujović je podnijela sljedeće (citiramo): „Za danas imam jednu zastupničku inicijativu koju upućujem Ministarstvu zdravstva, odnosno Domu zdravlja Kantona Sarajevo i Zavodu za javno zdravstvo. Zastupničku inicijativu upućujem za dostavljanje informacija o statusu nabavke HBB vakcine protiv virusnog Hepatitisa B u Domovima zdravlja Kantona Sarajevo kao obavezna imunizacije novorođenčadi, odnosno da mi se navede koji su razlozi nestašice ili kašnjenja nabavke i kada se očekuje normalizacija snabdijevanja? U posljednjim sedmicama obraćali su mi se roditelji iz više naselja u Kantonu Sarajevo, navodeći da u Domu zdravlja Kantona Sarajevo nije dostupna HBB vakcina za novorođenčad usprkos tome što se radi o obaveznoj zakonom propisanoj vakcini. Roditelji su izrazili zabrinutost zbog mogućnosti odlaganja treće doze, što može utjecati na kontinuitet imunizacije i zaštitu djece te su tražili informaciju kada će vakcina ponovo biti dostupna? S obzirom da se radi o vakcini od javnozdravstvenog značaja, da su roditelji već započeli imunizacijski ciklus smatram da je

neophodno hitno utvrditi razloge nedostupnosti i poduzeti sve mjere kako bi se obezbijedila redovna vakcinacija novorođenčadi. Odgovor na ovu inicijativu svakako tražim pismeno. A i zastupnička pitanja upućujem premijeru, Ministarstvu komunalne privrede i infrastrukture i prostornog uređenja, građenja i zaštite okoliša i Ministarstvu financija. Prvi dio pitanja kada će Ministarstvo komunalne privrede i infrastrukture, prostornog uređenja, građenja i zaštite okoliša raspisati javni poziv i krenuti implementaciju Zakona o doplati novčanih sredstava korisnicima subvencije po javnom pozivu za subvencioniranje i rješavanja stambenog pitanja mladih za 2023. godinu? S tim u vezi tražim i da mi se odgovori zašto se zaključkom Vlade Kantona Sarajevo od 09. oktobra 2025. godine, Službene novine Kantona Sarajevo, broj 41/25, koje se desilo prije usvajanja i stupanja na snagu pomenutog zakona, odobrila preraspodjela budžetskih sredstava sa izvora 10 na izvor 50 transferi za stavku Kapitalni transfer pojedincima, subvencioniranje mladih pri rješavanju stambenog pitanja u iznosu od 5 000 000 maraka? Odgovor tražim usmeno i pismeno.“

Zastupnik Ilijaz Pilav je podnio sljedeće (citiramo): „Ja imam jedno pitanje koje u različitim formulacijama već postavljam na istu temu 3 godine, a upućujem ga Vladi, odnosno premijeru. Želim da podsjetim i Vladu i ovaj dom da je 2022. godine ova Skupština usvojila Zakon o posebnim programima za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a Srebrenica. Prema ovom Zakonu, rok za uspostavu ureda za Srebrenicu bio je 60 dana i on je konačno uspostavljen dvije godine kasnije. Budžetima za 2023. i 2024. godinu bilo je predviđeno po 2 000 000 konvertibilnih maraka, dakle godišnje po 2 000 000. Realizacija za 2023. godinu je nula KM, za 2024. godinu 0 KM, budžetom za 2025. godinu bilo je predviđeno također 2 000 000 KM. I moje pitanje Vladi, odnosno premijeru, jeste kolika je bila realizacija za 2025. godinu i ako je bila, u kojim projektima su usmjerena sredstva? I dodatno pitanje da li će Ured za Srebrenicu podnijeti izvještaj o radu i kome?“

Zastupnica Sanela Klarić je podnijela sljedeće (citiramo): „Moje pitanje zastupničko se odnosi prema Ministarstvu za odgoj, odnosno to je inicijativa u Ministarstvu za odgoj, i obrazovanje Kantona Sarajevo i Institutu za razvoj preduniverzitetskog obrazovanja da se u saradnji sa Zavodom za planiranje razvoja Kantona Sarajevo izradi elaborat o opravdanosti i potrebama za osnivanje osnovne muzičke škole na području Opštine Novi Grad Sarajevo, a na osnovu kojeg bi se škola uvrstila u plan osnivanja škola na području Kantona Sarajevo. Općina Novi Grad Sarajevo predstavlja najveću opštinu u Bosni i Hercegovini prema broju stanovnika, sa izraženim demografskim rastom, i kontinuiranim povećanjem broja djece i mladih. I uprkos toj činjenici, na području Općine Novi Grad Sarajevo još uvijek ne postoji osnovna muška škola, što stvara značajan nedostatak u sistemu osnovnog obrazovanja i kulturnog razvoja. Rezultati ankete koja je preveđena od strane Asocijacije studenata Muzičke akademije u Sarajevu među građanima jasno pokazuje želju i opredijeljenost roditelja i učenika za uspostavom osnovne Muzičke škole na području Novog Grada Sarajevo. Dobijeni podaci potvrđuju da postoji stvarna i urgentna potreba za institucionalizacijom muzičkog obrazovanja u ovoj Općini, a muzičko obrazovanje kod djece uzrasta osnovne škole ima višestruke pozitivne efekte koji doprinose razvoju kognitivnih sposobnosti, koncentracije i discipline, potiče kreativnost, estetsku osjetljivost te jača socijalne vještine kroz kolektivne muzičke aktivnosti poput hora i orkestra. Iz tog razloga je osnivanje ovakve Muzičke škole na prostoru Općine veoma važno. Imam jedno zastupničko pitanje prema Ministarstvu komunalne privrede, infrastrukture, prostornog uređenja, građenja i zaštite okoliša. Kada planira da usvoji izmjene i dopune Uredbe o uređivanju i održavanju zelenih i rekreativnih površina u Kantonu Sarajevo? U maju je formirana radna grupa koja je u julu poslala izmjene i dopune, Nacrt izmjene i dopune ove Uredbe i interesuje me da li je Ministarstvo iskomuniciralo ovaj Nacrt sa ostalim zainteresovanim stranama i kada planira da se ova Uredba usvoji?“

Zastupnik Faruk Selmanović je podnio sljedeće (citiramo): „Upućujem, imam više inicijativa i pitanja pa ćemo nešto poslati mailom, a evo ovu usmeno. Znači, upućujem inicijativu u skladu sa članom 213. Poslovnika Skupštine Kantona Sarajevo kojom tražim da Vlada Kantona Sarajevo po hitnom postupku naloži hitno preispitivanje svih protupožarnih sistema u javnim institucijama u Kantonu Sarajevo, sa posebnim naglaskom na obrazovne institucije, socijalne i medicinske zdravstvene zaštite. 13 mrtvih i više od 30 ozlijeđenih u epilogu požara u Domu penzionera u Tuzli, 11 žrtva preminulo uslijed trovanja dimom. Ova tragedija je ponovo otvorila pitanje sigurnosti, nadzora i uslova u domovima u kojem borave najugroženije kategorije društva, starije osobe, ali i pitanje preispitivanja protupožarnih sistema i drugih i u drugim ustanovama u Kantonu Sarajeva, a prije svega u obrazovnim institucijama, institucijama socijalne i medicinske zaštite kako bi se spriječile ovakve i slične tragedije. Molim da se ovo uputi u hitnu proceduru, a napominjem da sam još 01.02.2024 godine uputio zastupničko pitanje na koje još nisam dobio odgovor, a koji se radi o protupožarnim zaštitama u stambenim zgradama u Kantonu Sarajevo. Upućujem i pitanje. Pitanje moje ide Ministarstvu pravde i uprave Kantona Sarajevo. Naime, svi smo ovih dana vidjeli da je naša ministrica boravila u posjeti Sjedinjenim Američkim Državama, što ovim putem i pozdravljamo. Trebamo da Kanton Sarajevo prezentiramo i u svijetu. Ono što mene interesuje, a na ova pitanja može i pismeni odgovor. U kom svojstvu i po kom osnovu je ministra pravde i uprave Kantona Sarajeva bila član državne delegacije? I, naravno, ko je snosio troškove za to putovanje? Moja sljedeća inicijativa je Ministarstvo unutrašnjih poslova Kantona Sarajevo. Prije svega pozdravljam i podržavam uvođenje dodatnih sigurnosnih mjera u saobraćaj u Kantonu Sarajevo. Međutim, ono što smo svi svjedoci proteklih dana jeste problem sa zaustavljanjem na proširenjima, odnosno autobuskim stajalištima, gdje ljudi vrlo često staju poslije ili prije autobuskih stajališta, što izaziva dodatne gužve, dodatne probleme, čak na određenim autobuskim stajalištima, kamere su i uništene odnosno skinute ili je stavljena crna kesa na njih, pa predlažem da Ministarstvo unutrašnjih poslova Kantona Sarajevo, do iznalaženja sistemskog rješenja koji će biti u funkciji osiguranja bezbjednosti učesnika u saobraćaju i neometanog odvijanja saobraćaja, privremeno stavi van funkcije nadzorne kamere koje su postavljene na 27 autobuskih stajališta, a kako bi se spriječilo upravo ovo stajanje poslije i prije, što može dovesti do lančanih sudara i dodatnih gužvi, pogotovo u jutarnjoj špici oko 8 sati i popodne od 4 do 5.”

Zastupnica Marijela Hašimbegović je podnijela sljedeće (citiramo): „Imam za današnju sjednicu pripremljene dvije inicijative, prezentirat ću jednu. Upućujem je Kantonalnoj upravi za inspekcijske poslove radi vršenja inspekcijskog nadzora nad radom Ministarstva za odgoj i obrazovanje Kantona Sarajevo i JU Instituta za razvoj preduniverzitetskog obrazovanja u predmetu Izrade izmjena nastavnih planova i programa i uvođenja novih zanimanja u srednjim školama. Tražim hitnu obustavu svih aktivnosti po pitanju izrade novih prijedloga nastavnih planova i programa i vraćanje u zakonske okvire i otvaranje dijaloga sa stručnim aktivom. Inicijativa je pokrenuta radi utvrđivanja povrede člana 117. Zakona o odgoju i obrazovanju u osnovnoj i srednjoj školi u Kantonu Sarajevo, tokom procesa izrade izmjena nastavnih planova i programa i uvođenja novih zanimanja u srednjim školama. Argumenti za povredu zakona su sljedeći: izostavljene su ingerencije stručnog aktiva propisanih članom 117. Ovaj član naglašava, dakle, praćenje realizacije MPP-a predlaganje mjera za unapređenje i predlaganje izmjena MPP-a. Proces izmjena nije transparentan i nije rezultat širokog stručnog dijaloga. Inicijativa se fokusira na predloženi novi MPP za zanimanje mašinski tehničar koji je izradio Institut za razvoj preduniverzitetskog obrazovanja Kantona Sarajevo. Predloženi MPP je u suprotnosti sa svrhom i standardima tehničkog srednjeg obrazovanja. Apsolutno je neprihvatljivo smanjenje ili ukidanje fonda časova ključnih predmeta matematika, fizika i hemija, također, značajno je umanjeno fond časova stručnih tehničkih predmeta npr. tehnička mehanika, tehničko crtanje i mašinski elementi. Ovakav prijedlog onemogućava stjecanje osnovnih znanja potrebnih za dalje obrazovanje na tehničkim fakultetima, posebno Mašinskom fakultetu. Stručni aktiv škole nije blagovremeno

informisan o konačnom sadržaju MPP-a, niti je obezbijeđen dovoljan vremenski okvir za stručnu raspravu, što dodatno potvrđuje netransparentnost u procesu. Nastavni planovi i programi moraju biti rezultat širokog stručnog dijaloga koji ima za cilj boljitak učenika, roditelja, nastavnika i privrede. U obrazloženju bih rekla da Ministarstvo za odgoj i obrazovanje jeste pokrenulo proceduru izmjena nastavnih planova i programa i uvođenje novih zanimanja, a ova inicijativa je upućena u ime Stručnog aktiva profesora mašinske grupe predmeta i Stručnog aktiva profesora opće obrazovnog predmeta povodom predloženog novog nastavnog plana i programa za zanimanje mašinski tehničar koji je izradio Institut za razvoj preduniverzitetskog obrazovanja. Predložene izmjene nastavnog plana i programa su apsolutno neprihvatljive jer su izostavljeni ključni predmeti koji su temelj svih tehničkih nauka i umanjeni fond časova, kao što sam već rekla, čime je dodatno čime se dodatno narušava kvalitet tehničke osposobljenosti učenika. Procesi izrade MPP-a rađeni su bez zakonom definisanog dijaloga sa strukom, što je direktan atak na kvalitet obrazovnog sistema koji treba da doprinosi napretku učenika, privrede i društva u cjelini.“

Zastupnik Adi Kalem je podnio sljedeće (citiramo): „Za današnju sjednicu sam pripremio nekoliko pitanja. Dva ću upravo obrazložiti. Prvo pitanje za Vladu Kantona Sarajevo i Ministarstvo za nauku i visoko obrazovanje i mlade Kantona Sarajevo. Javni poziv za sufinansiranje naučnoistraživačkih, umjetničko-istraživačkih, istraživačko-razvojnih projekata i programa iz Budžeta Kantona Sarajevo za 2025. godine nije raspisan, a za ove namjene u budžetu planirano je ukupno 4.400.000 konvertibilnih maraka, od čega 3 900 000 KM za program a) jačanje naučene infrastrukture. Ja bih zamolio pojašnjenje u kojoj je fazi realizacija ovog poziva, kada se može očekivati objava rezultata, dodjela sredstava, te koji su razlozi eventualnog kašnjenja u proceduri ako ih ima. Moje drugo pitanje je za Vladu Kantona Sarajevo i Ministarstvo financija Kantona Sarajevo. U kojoj fazi se nalazi izmjena i dopuna Zakona o komunalnim taksama Kantona Sarajevo, Službene novine Kantona Sarajevo broj 8/22, imajući u vidu Mišljenje Ustavnog suda Federacije Bosne i Hercegovine objavljeno u Službenim novinama Federacije Bosne i Hercegovine, broj 33/25 od 07.05 2025. godine. Također je, s obzirom na inicijativu Saveza općina i gradova Federacije BiH, upućeno početkom oktobra 2025. godine, Ministarstvu financija i Skupštini Kantona Sarajeva, kao inicijative Općina Kantona Sarajevo dostavljene početkom ovog mjeseca, molim da mi se dostavi informacija da li su započete aktivnosti na izmjenama i dopunama navedenog Zakona, u kojoj su trenutnoj fazi, te da li se može očekivati da će izmjene biti usvojene do kraja tekuće godine? Moram napomenuti da je Ustavni sud Federacije BiH dao razuman rok za usklađivanja zakonskog okvira kako bi općine mogle pravovremeno izmijeniti svoje odluke o visini komunalnih taksi, te da bi Porezna uprava Federacije BiH mogla da od početka naredne godine zakonito vrši razrez komunalnih taksi u skladu sa novim zakonom i općinskim odlukama.“

Zastupnica Elza Gaković je podnijela sljedeće (citiramo): „Današnju inicijativu upućujem prema Ministarstvu saobraćaja, Ministarstvu odgoja i obrazovanja Kantona Sarajevo, a polazeći od dopisa Javne ustanove Osnovne škole Mirsad Prnjavorac od 14.10.2025 godine, u kojem se ukazuje da dugotrajan problem postoji neredovnog, linijskog i nedovoljnog van linijskog prijevoza učenika. Podnosim zastupničku inicijativu kojom iniciram da Ministarstvo za odgoj i obrazovanje Kantona Sarajevo, u saradnji sa Ministarstvom saobraćaja Kantona Sarajevo i Općinom Vogošća hitno preispita postojeći sistem prijevoza učenika koji stanuju na udaljenosti većoj od 2 km od škole, te da poduzme mjera radi uspostavljanje redovnog linijskog prijevoza učenika na relacijama Blagovac 1 do Blagovac 4, Tihovići ulicu Ahmeda Rizve i Donja Jošanica 2, gdje trenutno dolazi do čestih poremećaja u saobraćaju i kašnjenju učenika na redovnu nastavu. Iniciram proširenje obuhvata besplatnog vanlinijskog prijevoza za učenike iz navedenih područja koji nisu obuhvaćeni važećim ugovorima o javnoj nabavci, usklađivanje kapaciteta autobusa sa brojem učenika koji koriste prijevoz i kako bi se spriječile situacije prepunjenosti vozila i

ugrožavanja sigurnosti djece, uvođenje mehanizma nadzora nad realizacijom prijevoza učenika uz obavezno uključivanje školskih uprava i Vijeća roditelja u praćenje i prijavljivanje nepravilnosti. Ovaj problem direktno utiče na redovno pohađanje nastave, sigurnost učenika i kvalitet obrazovanja, te zahtijeva žurno djelovanje nadležnih organa. Smatram da je u interesu svih učenika, roditelja i škola na području Općine Vogošća da se pitanje školskog prijevoza trajno i sistemski uredi kako bi se spriječila kašnjenja i potencijalne povrede učenika. Posebnu odgovornost daje nam obaveza prema djeci sa invaliditetom koja su svakodnevno izložena životnom riziku na putu od kuće do škole i obratno. Zaista, sa jednim velikim apelom molim nadležne da poduzmu sve aktivnosti za realizaciju pomenute inicijative u što kraćem vremenskom roku.“

Zastupnik Jasmin Šaljić je podnio sljedeće (citiramo): „Imam dva pitanja i jednu inicijativu. Jedno pitanje za ministricu obrazovanja. Prema navodima roditelja, bila bi to već treća uzastopna godina da učenici sportskog usmjerenja nemaju priliku učestvovati u ovim obaveznim aktivnostima. Roditelji učenika sportskog odjeljenja Pete gimnazije Sarajevo izrazili su ozbiljnu zabrinutost zbog informacija da ni ove školske godine neće biti realizovan praktični dio nastave, iz plivanja i skijanja, ključnih aktivnosti, propisanih nastavnim planom i programom. Prema navodima roditelja, ukoliko se ove informacije pokažu tačnim, bile bi to već uzastopna, treća godina da učenici sportskog usmjerenja nemaju priliku učestvovati u ovim obaveznim aktivnostima. Pa evo, molim ministricu, ako može, da nešto da nam kaže. Jedno pitanje za Ministarstvo unutrašnjih poslova. Zašto na novim uniformama pripadnika Ministarstva unutrašnjih poslova nema pločica sa imenom i prezimenom jer znate da smo imali i u periodu agresije? Znači u najtežim mogućim vremenima imali smo akreditovane policajce, to se nastavilo i nakon agresije, pa smo imali i pločice, nove uniforme, ljudi su prihvatili i građani, ali vidimo da nema imena i prezimena. Jel to u pitanju neki tehnički problem ili će to biti ili je to neka odluka rukovodstva? Pa eto molim vas da nam pojasnite, ime i prezime je neophodno. I imam jednu inicijativu. Inicijativa za usvajanje Pravilnika o radu Javnog preduzeća Televizija Sarajevo. Svi znamo u kakvim uslovima rade zaposleni u javnom servisu Televizija Sarajevo, da bukvalno nema nikakvih uslova, da to i nije ni zdravo okruženje. I na sve to jedini nemaju potpisan kolektivni ugovor. Želim da upoznam javnost, da zaposleni u Televiziji Sarajevo jedini nemaju kolektivni ugovor, te da za rad ovog servisa i plate zaposlenih Vlada Kantona Sarajevo svake godine izdvaja grant sredstva. Evo samo sekundu, pokrećem inicijativu Inicijativa za usvajanje pravilnika o radu u JP TVSA. Obzirom da 25 godina zaposleni u TVSA nisu dobili jasno obrazloženje zašto nemaju kolektivni ugovor kao ostali budžetski korisnici kojima su ugovorom garantovana određena prava, pokrećem inicijativu prema mladim Kantona Sarajevo, nadležnom resornom ministarstvu, upravi poduzeća i Nadzornom odboru Televizije Sarajevo da je usuglasilo resorno ministarstvo, usvoje novi Pravilnik o radu Javnog poduzeća Televizija Sarajevo. Obrazloženje: na zahtjev Uprave preduzeća, a na preporuku ministrice resornog ministarstva, gospođe Kadenić, formirana je radne grupa za izradu novog Pravilnika o radu javnog poduzeća TVSA. U preporuci ministrice Kadenić prema radnicima i upravi TVSA stoji da gotovo sva prava mogu ugraditi u novi Pravilnik koji će biti važniji za uposlene od Kolektivnog ugovora, mogu preciznije definisati sve osim financija o kojima odlučuje Vlada Kantona Sarajevo. Radnu grupu za izradu novog Pravilnika činili su članovi sindikata Televizije Sarajevo i Vijeće uposlenika Televizije Sarajevo i članova pravne službe. Radna grupa je na izradi novog pravilnika radila 6 mjeseci. Dana 17. oktobra 2024 godine predala dokument na Protokol Televizije Sarajevo. U tom dokumentu jasno su definisani posebni uslovi o radu, o zaštiti radnika i sve ostalo osim financija. Pozivam Upravu TVSA, Nadzorni odbor i nadležno Ministarstvo da u što skorijem roku usvojen novi Pravilnik o radu i tako barem donekle ispravi decenijsku nepravdu prema radnicima TVSA. Pozivam Vladu Kantona Sarajevo da osiguraju sredstva u godišnjem budžetu kako bi se osigurala prava radnika Pravilnikom o radu.“

Zastupnica Miomirka Melank je podnijela sljedeće (citiramo): „Ja bih htjela da jednu inicijativu koju sam podnijela prije dva mjeseca ponovno iznesem na svjetlo dana i da zapitam šta se zapravo događa u vezi sa tim? Prije 2 mjeseca dakle, sam podnijela inicijativu da Vlada Kantona osnuje stručni tim za izradu plana menadžmenta konzervacije objekta Centra Skenderije u Sarajevu. Posebno je na ovo iz Vlade trebao da odgovori ministar Zlatko Mijatović, s obzirom na to da je ovo javno preduzeće u djelokrugu Ministarstva privrede. U međuvremenu je dostavljen prijedlog Ministarstvu najkompetentnijih stručnjaka iz oblasti arhitekture i urbane baštine, kao i prijedlog terminskog plana i aktivnosti koje treba preduzeti. Kako se ispostavilo, do sada ovi parcijalni pokušaji da na Skenderiji se uradi jedan po jedan dio nisu dali željene rezultate, te je stoga zapravo nužno da se uspostavi jedan stručni tim i da se rekonstrukcija, zapravo konzervacija obavi u suradnji politike i struke. Prijedlog projektnog zadatka za izradu plana menadžmenta konzervacije za Kulturno sportski centar Skenderija podrazumijeva tri etape. U prvoj etapi bi se evaluirao značaj i definisali iskazi o značenju djela. Naime, Skenderija spada u jednu od najznačajnijih djela arhitekture iz perioda kraja 20. vijeka, ne samo u Bosni i Hercegovini, nego na teritoriju Jugoslavije. I zbog toga je potrebno uraditi detaljnu analizu djela, uključujući njegovu istoriju, materijalno stanje, kao i zainteresirane strane koji će učestvovati u daljem procesu menadžmenta konzervacije. U drugoj etapi bi se trebale definisati politike menadžmenta konzervacije, uključujući zakonski okvir, politiku upotrebe, transformaciju djela, rizike, energetska efikasnost itd. Sve ono što se u stvari radi pri izgradnji novih objekata. U trećoj etapi je definisanje hijerarhije rasporeda i vremenskih okvira. Svi, sve ove etape bi trebale biti završene do prve polovine '26. godine. I ja apelujem još jednom da učinimo sve da dođe do formiranja ovog tima koji će ovaj zadatak početi da završava.“

Zastupnica Adna Mesihović je podnijela sljedeće (citiramo): „Ja imam dva pitanja za ministricu visokog obrazovanja i Ministarstva za nauku visokog obrazovanja i mlade. I evo, nadovezat ću se na ovo pitanje zastupnika Adia Kalema, zašto do danas, 14. 11. 2025. godine nije objavljena lista dobitnika sredstava po javnom pozivu za sufinansiranje naučno-istraživačkih i umjetničko-istraživačkih i istraživačko-razvojnih projekata i programa iz Budžeta Kantona Sarajevo za 2025. godinu, a javni poziv je objavljen 11.06.25. godine. U Budžetu za 25. godinu u ovom Ministarstvu su za realizaciju lotova iz ovog poziva planirana sredstva u iznosu 4 400 000 maraka. Također, Vlada Kantona Sarajevo ima i zakonsku obavezu, prema Zakonu o naučno-istraživačkoj djelatnosti, članu 8, da svake godine osigura sredstva za podršku naučnoistraživačke djelatnosti u iznosu ne manjem od 0, 65 % od ukupnog Budžeta Kantona Sarajevo, što bi bila mnogo veća cifra i od ove planirane u Budžetu. Da li Ministarstvo smatra da ovim kašnjenjem ne ostavlja dovoljno prostora za sklapanje ugovora sa dobitnicima projekata jer često, je li kroz te projekte podrazumijeva se i nabavka opreme. Ovo je bilo pitanje do jučer, međutim, jučer je na web stranici Ministarstva objavljeno da je dio ovog javnog poziva poništen, pa imam sljedeće pitanje. Zašto je jučer na web stranici Ministarstva objavljeno poništenje dijela javnog poziva, i to dva esencijalna lota iz ovog javnog poziva, a koji je, podsjećam, objavljen u šestom mjesecu, bez ikakvog objašnjenja, i to dva elementarna lota, a to je Program A 1 A sufinansiranje naučnoistraživačkih i umjetničko-istraživačkih i istraživačko-razvojnih projekata od posebnog interesa za Kanton Sarajevo, a za koje je za koji je po javnom pozivu bilo namijenjeno 3 900 000 konvertibilnih maraka, a također, poništen je i dio javnog poziva po Programu A1- B, a to je sufinansiranje naučnoistraživačkih, umjetničko istraživačkih i istraživačko razvojnih projekata čiji su nosioci mladi naučnici, a za koji je bilo po javnom pozivu namijenjeno 500 000 maraka jel sredstava. Znači nakon poništenje dijela javnog poziva od ukupno 4 400 000 maraka kako je planirano za koja se planiraju je li u budžetu kada se oduzme ova 2 lota koja su poništena, ukupno će se za nauku iz ovog Ministarstva ove godine ovaj podijeliti 500 000 konvertibilnih maraka, što je mnogo manje od one zakonske obaveze od 0, 65 %, koliko bi trebalo da se godišnje izdvaja. Hvala vam. Molim usmeni i pismeni odgovor.“

Zastupnik Mahir Dević je podnio sljedeće (citiramo): „Dobili smo jedno pismo iz Gerontološkog centra u kome nas upozoravaju na pitanje kvaliteta električnih instalacija i ugradnju određenih klima koje oni vjerojatno koristi za grijanje. Tamo se navodi da to može prouzrokovati ozbiljne probleme od kojih bi, ne daj Bože, mogao nastati požar. Naš je apel iz Kluba evo SDA i u svoje lično ime prema Ministarstvu socijale, da u toj ustanovi i svim drugim ustanovama se na neki način provede barem interni neki inspekcijski nadzor ili da se pozovu direktori tih institucija da se s njima porazgovara, da ne bi, ne daj Bože, došlo do neke katastrofe. To je ovaj dio. Pitanje za ministra financija. Prošli put sam ga postavio, s obzirom da ne objavljujete informaciju na stranci Ministarstva financija o izvršenju budžeta, a to je bio običaj kvartalno da se radi, naravno, pretpostavljamo zašto to ne objavljujete, zato što ste transparentni kao i oni svi vaši ugovori koje krijete od nas, odgovorite nam na pitanje koliko je deficit Budžeta Kantona Sarajevo zaključno sa ovom našom današnjom sjednicom? To je jedno pitanje. Drugo je, u '25. godini ste bili planirali zaduženje od ukupno 223 300 000 konvertibilnih maraka, koliko je od tog iznosa zaista i ostvareno tokom 2025. godine i za šta su utrošena ta sredstva? Zamolit ću za usmeni odgovor. Inicijativa prema Ministarstvu za odgoj i obrazovanje osnovna i srednja škola, zakon. Znači imamo jedan problem koji je dosta izražen spram učenika koji imaju prebivalište u Kantonu Sarajevo, a pohađaju srednje škole prevashodno van Kantona Sarajevo. Znači ovo se više odnosi na srednje škole, čini mi se u osnovnim školama da takvih problema nemamo, imate u ovim rubnim općinama Kantona, evo mogu govoriti konkretno u Ilijašu, čini mi se, 80 i više učenika koji pohađaju škole, ne znam u Brezi, Visokom, Varešu, neki idu, ne znam u Franjevačku gimnaziju u Visokom, neki u Medresu Osman efendija Ređović, neki u neku drugu gimnaziju, neki u neku elektrotehničku školu koja im je možda bliža nego negdje da dolaze u Sarajevo itd. Konkretno, njih 80 nemaju pravo na subvenciju prijevoza, a npr. 80 druge djece koja dolaze iz Zeničko- dobojskog Kantona imaju pravo da budu subvencionirana s pitanjem prijevoza. Znači, vi ste u ovom Zakonu ministricе pitanje prijevoza regulisali sa pohađanjem škole, što ima veze da se određeni broj učenika očuva u Kantonu Sarajevo. Međutim, mi smatramo da bi bilo dobro da se ovo razmotri i da se to ipak veže za prebivalište za prebivalište znači da ne bismo sada pravili diskriminaciju spram svojih učenika koji živi u Kantonu Sarajevo. Čini mi se da je to član 76 stav 1. Zakon o odgoju i obrazovanju koji definiše prijevoz učenika. Znači u stavu 1) kaže: „Kanton u saradnji sa Gradom, Općinama i drugim zainteresovanim subjektima obezbjeđuje sredstva za financiranje troškova prijevoza učenika osnovnih i srednjih škola sa područja Kantona. Znači, pokrećemo inicijativu da ovaj član izmijenite uskraćenoj proceduri, da ne bismo imali diskriminaciju učenika koji žive, stvarno imaju prebivalište u Kantonu Sarajevo.“

Zastupnik Samir Avdić je podnio sljedeće (citiramo): „Evo, imali smo priliku čuti dvije inicijative, a u vezi su sa nečim o čemu sam i ja danas planirao govoriti, to su inicijative kolege Selmanovića i kolege Devića. Pridružujem se objema inicijativama i kao neko ko je o tome govorio i prije 2 godine, prilikom usvajanja Izvještaja Civilne zaštite Kantona Sarajevo i dobio određene odgovore, pokušat ću, evo javnost i ovdje prisutnima iznijeti ono do čega sam ja do danas došao i neku su inicijative prema Vladi Kantona Sarajevo, ali i prema inspektorima za vatrozaštitu pri Ministarstvu unutrašnjih poslova i Kantonalnoj Upravi za inspekcijske poslove, a u vezi je sa potrebom da se uradi ozbiljna revizija i analiza sigurnosnih protupožarnih sistema, tu mislim na protupožarne aparate, hidrante, crijeva, požarne puteve, požarne stepenice itd. U svim ustanovama, ali prije svega u onim ustanovama koje se bave ranjivim društvenim grupama poput domova, škola i bolnica, ali i ustanovama koje okupljaju, odnosno unutar kojih se okuplja veliki broj ljudi, posjetioca poput muzeja, pozorišta, dvorana, stadiona, vjerskih objekata itd. Mislim da neću iznijeti nikakvu ekskluzivu, ukoliko, evo i sam zaključim, iznesem da ne možemo biti zadovoljni stanjem tih protupožarnih sistema, odnosno možda možemo samo u nekim novijim zgradama. Razlog je ta neka vrsta proturječnosti između formalnosti i funkcionalnosti. Formalno nadležni običu ustanove, stave datume da su atestirali, provjerili aparate, funkcionalno je pitanje koliko je to uopšte funkcionalno. Imali smo ovaj tragičan događaj u Tuzlanskom Kantonu, nikada

niko od nas neće zaboraviti na događaj iz 2007. godine i beba u Domu za djecu bez roditeljskog staranja, ponavljam, iz 2007 godine i nakon toga se nešto u Kantonu i mijenjalo i radilo. Međutim, evo, izražavam bojazan da se nije uradilo dovoljno. Kada uputite Civilnoj zaštiti ili nekoj opštini inicijativu i zamolite ih da u skladu sa svojim finansijskim mogućnostima, a te mogućnosti nisu male s obzirom na kapacitete finansijske koje imaju pri civilnim zaštitama, onda će reći da nisu nadležni, već su za to nadležni upravitelji. Međutim, imamo primjer od prije nekoliko godina u Novom Sarajevu, za vrijeme načelnika Tanovića, gdje je opština izdvojila iz civilne zaštite i kupila potrebne hidrante, spojke, ventile itd te ih putem upravitelja distribuirala u zgradama kolektivnog stanovanja u opštini Novo Sarajevo. Evo i završiti ću sa ovim. Potrebno je i s obzirom da imam informaciju da ne posjedujemo vozilo za požar iznad osmog sprata, potrebno je planirati nabavku takvog vozila za Kanton Sarajevo, posebno s obzirom na neke zgrade, na Alilpašinu, Tibri itd. Izvinjavam se ako sam uzeo malo više vremena.“

Zastupnik Faruk Kapidžić je podnio sljedeće (citiramo): „Stoga Vas kao ministar kulture i sporta Kantona Sarajevo obavezujem da promptno zakažete hitnu sjednicu Upravnog odbora na kojoj ćete razmotriti i usvojiti izmjene uslova za direktora“. Ovo je dio dopisa koje je Ministarstvo napravilo Javnoj ustanovi Narodno pozorište Sarajevo, i to 29.09.2025. gdje se traže izmjene uslova za izbor direktora tako što se smanjuje uslov sa 7 godina radnog staža na 4 i uslovi o stručnoj spremi se omogućavaju bilo kome. Moje pitanje, dakle za ministra da kome se namješta ovaj konkurs, odnosno ko to želi da se dovede na ovaj način na to mjesto, iako je izgovor da se time ovaj kandidat, da je bez izmjene uslova smanjen vrlo uzak broj kandidata koji mogu da se kandiduju. Da li je to rađeno zbog nekoga ili ne smatrate kandidate koji imaju ove uslove da su vaši kandidati pa ih ne smatrate kao mogući kandidati za to mjesto?“

Zastupnik Muamer Bandić je podnio sljedeće (citiramo): „Imam zastupničku inicijativu. Na osnovu uočenih potreba stanovnika naselja Alipašino Polje C faza. Pokrećem inicijativu prema Ministarstvu zdravstva Kantona Sarajeva, Javnoj ustanovi Dom zdravlja Kantona Sarajevo, da obezbijedi još jedan tim porodične medicine u ambulanti Alipašino Polje C faza. U navedenoj ambulanti trenutno funkcioniše samo jedan tim porodične medicine, dok je broj aktivnih medicinskih kartona dosegao više od 2100 kartona. Imajući u vidu da naselje Alipašino Polje C faza broji više od 7000 stanovnika. Evidentno je da postojeće kapaciteti nisu dovoljni da zadovolje stvarne potrebe stanovništva. Preopterećenost postojećeg tima dovodi do drugih, do dugih perioda čekanja, stvaranja gužvi u ambulanti, negodovanje pacijenata, te povremenih situacija koje narušavaju red i rad u zdravstvenoj ustanovi. Imajući u vidu sve navedene činjenice, kao i standarde primarne zdravstvene zaštite koji propisuju optimalan broj pacijenata po timu porodične medicine, predlažem da se odobri dodatni tim porodične medicine u ambulanti Alipašino Polje C faza u što skorijem roku. Imam jedno pitanje za ministra privrede. Poljoprivreda kao grana privrede predstavlja sektor niske profitabilnosti, koji je dodatno opterećen negativnim uticajima, klimatskim promjenama, pojavom raznoraznih bolesti poput bruceloze i sličnih i drugim faktorima koji prouzrokuju značajnu materijalnu štetu poljoprivrednim proizvođačima. S obzirom na to da je proizvodnja hrane od suštinskog značaja za očuvanje života i stabilnost društva u većini zemalja svijeta, ona se tretira kao strateška djelatnost, što bi prema zakonskim obavezama trebalo da bude slučaj i u Kantonu Sarajevo. Međutim, prema svim pokazateljima, Ministarstvo privrede Kantona Sarajevo ovu obavezu ne poštuje u dovoljnoj mjeri, što izaziva opravdano nezadovoljstvo među poljoprivrednim proizvođačima, kao i izraz tog nezadovoljstva organizovali su čak i proteste poljoprivrednika koji su, iako mirnog karaktera, zaustavljeni na ulazima u grad. U Budžetu Kantona Sarajevo predviđena su sredstva za subvencioniranje poljoprivredne proizvodnje, ali su ona do sada u vrlo malom obimu isplaćena poljoprivrednicima. Postoji opravdana sumnja da preuzete obaveze neće biti realizovane do kraja fiskalne godine, čime će brojna gazdinstva koja su direktno zasnivana na poticajnim sredstvima biti dovedena na rub gašenja. Takav odnos vlasti može imati dugoročno negativne posljedice,

uključujući i smanjenje domaće proizvodnje i povećanje zavisnosti od uvozne hrane. Poseban problem predstavlja činjenica da su poljoprivredni proizvođači u potpunosti zavisni od otkupljivača koji često imaju monopol i diktiraju otkupne cijene na koje proizvođači ne mogu utjecati. To dodatno otežava njihovu egzistenciju, a uz izostanak podrške institucija dovodi do zatvaranja farmi i gašenja proizvodnje u koju su uložena značajna sredstva. Vlada Kantona Sarajevo, a posebno Ministarstvo privrede je svojim postupcima i nepostupanjem faktički onemogućava ostvarivanje svrhe Zakona o poticaju u poljoprivredi, umjesto da aktivno radi na povećanju izdavanja i pojednostavljivanju administrativnih procedura u praksi se često suprotno stvara utisak da dodatne administracije i barijere smanjuju sredstva i usporava isplatu poticaja. Primjer takve prakse jeste prebacivanje gazdinstva s manjim brojem stoke na budžet općina Kantona Sarajevo, čime se smanjuje broj korisnika na Kantonalnom nivou i umanjuje obaveze isplate subvencija. Osim toga, Ministarstvo šalje veliki broj rješenja o odbijanju zahtjeva za poticaj, često obrazloženih formalnim i nelogičnim razlozima poput jedne rečenice u zahtjevu koja nije u potpunosti usklađena sa pravilnikom. . Iako je zahtjev uredno zaprimljen i ranije i ranije su važili. Na taj način proizvođačima se onemogućava da isprave eventualne nedostatke iako je Ministarstvo po članu 67. Zakona u Upravnom postupku Federacije Bosne i Hercegovine bilo dužno da ih na blagovremen način upozori. Iz tih razloga nije ostvarena svrha zakona poticaja, već se, ustvari putem administrativnih poteškoća onemogućavaju poljoprivrednici da ostvare pravo na poticaje.“

Zastupnik Davor Čičić je podnio sljedeće (citiramo): „Imat ću danas dva zastupnička pitanja. Prvo pitanje adresiram prema rukovodstvu Općinskog vijeća Novi Grad Sarajevo, a koje glasi: kada mislite ispoštovati presudu Ustavnog suda Federacije Bosne i Hercegovine? Znači prema Presudi Ustavnog suda Federacije Bosne i Hercegovine, do 17.09.2025. godine Rješenja o izboru predsjedavajućeg, zamjenika predsjedavajućeg Općinskog vijeća Novi Grad, mišljenje glasi da nisu u skladu sa Ustavom Federacije Bosne i Hercegovine i to je objavljeno u Službenim novinama Federacije Bosne i Hercegovine, pa mene zanima koji je vremenski okvir i kada tačno planirate ispoštovati Presudu Ustavnog suda Federacije Bosne i Hercegovine ili presude Ustavnog suda važe samo za pojedine slučajeve i samo selektivno. Pa eto, čisto me zanima da mi odgovore na ovo pitanje. Drugo moje pitanje ide prema Ministarstvu pravde i uprave Kantona Sarajevo, ministrica ako može sada ili može i pismenim putem. S obzirom da je u oktobru ove godine stupio na snagu i novi Zakon o zaštiti ličnih podataka na području, odnosno u Bosni i Hercegovini, zanima me da li je Ministarstvo detektovalo određene zakone koje bi, s obzirom na ove neke nove stvari koje je taj Zakon donio da li su detektovali zakone iz Kantona Sarajevo koje bi ova Skupština trebala mijenjati, a u skladu sa tim novim izmijenjenim Zakonom o zaštiti podataka u Bosni i Hercegovini?“

Nakon iscrpljene liste prijavljenih za pitanja i inicijative, odgovore na postavljena pitanja su ponudili: *ministar zdravlja, Enis Hasanović, ministar finansija, Afan Kalamujić, sekretar Ministarstva unutarnjih poslova, Tarik Kršlak, ministrica pravde i uprave, Darja Softić-Kadenić, ministrica za nauku, visoko obrazovanje i mlade, Dušanka Bošković, ministrica osnovnog i srednjeg obrazovanja, Naida Hota-Muminović.*

Zastupnica *Admela Hodžić* je tražila poslovničku intervenciju jer nije dobila usmeni odgovor od ministra Mladena Pandurevića na svoje postavljeno pitanje.

Realizacija tačke dva.

AD-2.

NACRT BUDŽETA KANTONA SARAJEVO ZA 2026. GODINU

Zastupnici su materijal dobili uz poziv za sjednicu. Uvodne napomene je podnio ministar finansija, Afan Kalamujić.

Na inicijativu zastupnika, dopredsjedavajuća Jelena Pekić je predložila pauzu za ručak, koju su zastupnici većinom glasova podržali (23 glasa „za“ i 1 glas „protiv“).

NASTAVAK NAKON PAUZE

U nastavku nakon pauze predsjedavajući Okerić je otvorio diskusiju po ovoj tački u kojoj su učestvovali zastupnici: *Muamer Bandić, Marijela Hašimbegović, Jasmin Šaljić, Vedrana Vujović, Smiljana Viteškić, Mahir Dević, Admela Hodžić, Faruk Selmanović, Faruk Kapidžić, Rusmir Pobrić, Elza Gaković, Redžo Lemezani, Elvis Vreto, Haris Zahiragić, Adi Kalem, Samir Avdić i Davor Čičić.*

U međusobnom repliciranju su učestvovali zastupnici: *Elvedin Okerić – Muamer Bandić, Redžo Lemezani – Vedrana Vujović, Samir Avdić – Vedrana Vujović, Belma Kapo – Vedrana Vujović, Muamer Bandić – Vedrana Vujović, Davor Čičić – Mahir Dević, Elvis Vreto – Mahir Dević, Miomirka Melank – Mahir Dević, Vedrana Vujović – Faruk Selmanović, Mahir Dević – Elvis Vreto, Jasmin Šaljić – Elvis Vreto, Samir Avdić – Haris Zahiragić, Faruk Kapidžić – Haris Zahiragić, Davor Čičić – Haris Zahiragić, Jelena Pekić – Haris Zahiragić, Faruk Kapidžić – Samir Avdić, Muamer Bandić – Samir Avdić, Mahir Dević – Samir Avdić, Haris Zahiragić – Samir Avdić, Faruk Selmanović – Samir Avdić.*

Ispravku krivog navoda su imali zastupnici: *Miomirka Melank, Davor Čičić, Elza Gaković, Belma Kapo, Muamer Bandić, Samir Avdić, Jasmin Šaljić, Mahir Dević, Adi Kalem, Haris Zahiragić i Muamer Bandić.*

Poslovničku intervenciju su koristili zastupnici: *Muamer Bandić, Davor Čičić, Belma Kapo, Mahir Dević, Haris Zahiragić i Miomirka Melank.*

Tokom diskusija data je petnaestominutna pauza na zahtjev šefa Kluba SDA, Mahira Devića.

Obzirom da nije bilo više prijavljenih za diskusiju predsjedavajući je istu zaključio i predložio je da se, u skladu s članom 94. Poslovnika Skupštine KS, izjašnjavanje po ovoj tački provede odmah, što su zastupnici podržali većinom glasova, (s 22 glasova „za“, 6 glasova „protiv“ i 1 glas „suzdržan“).

Na osnovu rezultata glasanja, predsjedavajući je konstatovao da je Skupština po Nacrtu Budžeta Kantona Sarajevo za 2026.godinu donijela sljedeći Zaključak, (s 26 glasova „za“ i 5 glasova „suzdržan“):

- 1. Utvrđuje se Nacrt Budžeta Kantona Sarajevo za 2026. godinu.*
- 2. Nacrt Budžeta iz tačke 1. ovog zaključka stavlja se na javnu raspravu.*
- 3. Javna rasprava održat će se u kantonalnim organima uprave, jedinicama lokalne samouprave, kantonalnim ustanovama i javnim preduzećima i trajat će 20 dana.*
- 4. Primjedbe, prijedlozi, sugestije zastupnika i mišljenja radnih tijela Skupštine dostavljaju se Vladi Kantona Sarajevo koja organizuje i provodi javnu raspravu, putem Ministarstva finansija Kantona Sarajevo.*
- 5. Vlada Kantona Sarajevo je dužna, nakon provedene javne rasprave Skupštini Kantona Sarajevo, dostaviti Izvještaj o rezultatima javne rasprave koji sadrži primjedbe, prijedloge i mišljenja kao i da obrazloženje razloga zbog kojih pojedine primjedbe, prijedlozi i*

mišljenja nisu prihvaćeni u pripremi Prijedloga Budžeta Kantona Sarajevo za 2026. godinu.

6. *Ovaj zaključak stupa na snagu danom donošenja.*

Realizacija tačke tri.

AD-3.

NACRT ZAKONA O IZVRŠENJU BUDŽETA KANTONA SARAJEVO ZA 2026. GODINU

Zastupnici su materijal za tačku dobili uz poziv za sjednicu. Smatrali su da nisu potrebne uvodne napomene predlagača materijala.

Kako nije bilo prijavljenih za diskusiju, predsjedavajući je istu zaključio i predložio je da se, u skladu s članom 94. Poslovnika Skupštine KS, izjašnjavanje po ovoj tački provede odmah, što su zastupnici podržali većinom glasova, (s 21 glas „za“, 6 glasova „protiv“ i 1 glas „suzdržan“).

Na osnovu rezultata glasanja konstatovano je da je Skupština većinom glasova po Nacrtu zakona o izvršavanju Budžeta Kantona Sarajevo za 2026.godinu donijela sljedeći Zaključak, (s 18 glasova „za“ i 5 glasova „protiv“):

1. *Utvrđuje se Nacrt Zakona o izvršavanju Budžeta Kantona Sarajevo za 2026. godinu.*
2. *Nacrt zakona iz tačke 1. ovog zaključka stavlja se na javnu raspravu.*
3. *Javna rasprava održat će se u kantonalnim organima uprave, jedinicama lokalne samouprave, kantonalnim ustanovama i javnim preduzećima i trajat će 20 dana.*
4. *Primjedbe, prijedlozi, sugestije zastupnika i mišljenja radnih tijela Skupštine dostavljaju se Vladi Kantona Sarajevo koja organizuje i provodi javnu raspravu, putem Ministarstva finansija Kantona Sarajevo.*
5. *Vlada Kantona Sarajevo je dužna, nakon provedene javne rasprave, Skupštini Kantona Sarajevo dostaviti Izvještaj o rezultatima javne rasprave koji sadrži primjedbe, prijedloge i mišljenja kao i da da obrazloženje razloga zbog kojih pojedine primjedbe, prijedlozi i mišljenja nisu prihvaćeni u pripremi Prijedloga zakona o izvršavanju Budžeta Kantona Sarajevo za 2026. godinu.*
6. *Ovaj zaključak stupa na snagu danom donošenja.*

Realizacija tačke četiri.

AD- 4.

PRIJEDLOG ODLUKE O STANDARDIMA I KRITERIJIMA ZA IMENOVANJE NA POZICIJU ČLANOVA NEZAVISNOG ODBORA SKUPŠTINE KANTONA SARAJEVO

Zastupnici su materijal dobili uz poziv za sjednicu. Uvodno izlaganje u svojstvu predsjedavajućeg Komisije za izbor i imenovanja i administrativna pitanja Skupštine Kantona Sarajevo je podnio *predsjedavajući Elvedin Okerić.*

U diskusiji su učestvovali zastupnici: *Vedrana Vujović, Muamer Bandić, Faruk Selmanović, Jasmin Šaljić i Adi Kalem.*

U međusobnom repliciranju su učestvovali zastupnici: *Elvedin Okerić - Muamer Bandić, Elvedin Okerić – Faruk Selmanović, Mahir Dević – Elvedin Okerić.*

Ispravku krivog navoda je koristio zastupnik *Muamer Bandić.*

Obzirom da nije bilo više prijavljenih diskutanata, predsjedavajući je zaključio diskusije i pozvao zastupnike da se izjasne u skladu s Članom 94. Poslovnika Skupštine KS, te je *nakon izjašnjavanja, konstatovano je da je Skupština većinom glasova podržala da se izjašnjavanje po ovoj tački dnevnog reda provede odmah.* (s 19 glasova „za“ i 6 glasova „protiv“).

Na osnovu rezultata glasanja, konstatovano je da je Skupština većinom glasova donijela Odluku o standardima i kriterijima za imenovanje na poziciju članova Nezavisnog odbora Skupštine Kantona Sarajevo, (s 18 glasova „za“, 5 glasova „protiv“ i 3 glasa „suzdržan“).

Realizacije tačke pet.

AD- 5.

PRIJEDLOG ODLUKE O IZMJENAMA ODLUKE O IZBORU PREDSEDAVAJUĆIH, ZAMJENIKA PREDSEDAVAJUĆIH I ČLANOVA STALNIH RADNIH TIJELA SKUPŠTINE KANTONA SARAJEVO

Zastupnici su materijal dobili uz poziv za sjednicu. Uvodno izlaganje u svojstvu predsjedavajućeg Komisije za izbor i imenovanja i administrativna pitanja Skupštine Kantona Sarajevo je podnio *predsjedavajući Elvedin Okerić.*

Zastupnica Vedrana Vujović je intervenisala u smislu da je u Prijedlogu odluke uočila tehničku grešku pa je predložila da se ista zapisnički konstatuje, za što se predsjedavajući zahvalio.

Obzirom da nije bilo više prijavljenih diskutanata, predsjedavajući je zaključio diskusije i pozvao zastupnike da se izjasne u skladu s Članom 94. Poslovnika Skupštine KS, te je *nakon izjašnjavanja, konstatovano je da je Skupština jednoglasno podržala da se izjašnjavanje po ovoj tački dnevnog reda provede odmah.* (s 27 glasova „za“).

Na osnovu rezultata glasanja, konstatovano je da je Skupština jednoglasno donijela Odluku o izboru predsjedavajućih, zamjenika predsjedavajućih i članova stalnih radnih tijela Skupštine Kantona Sarajevo, (s 27 glasova „za“).

Realizacija tačke šest.

AD-6.

PRIJEDLOG ODLUKE O PROŠIRENJU DJELATNOSTI JAVNE USTANOVE SREDNJA ŠKOLA ZA TEKSTIL, KOŽU I DIZAJN SARAJEVO NA DJELATNOST OBRAZOVANJA ODRASLIH

Zastupnici su dobili materijal uz poziv za sjednicu. Uvodno izlaganje u svojstvu predlagача materijala je podnijela *ministrica odgoja i obrazovanja, Naida Hota-Muminović.*

U diskusiji je učestvovala zastupnica *Miomirka Melank.*

Nakon što je zaključio diskusiju po ovoj tački, predsjedavajući je predložio da se u skladu sa članom 94. Poslovnika Skupštine Kantona Sarajevo o ovoj tački odmah izjašnjava, što su zastupnici jednoglasno podržali, (s 26 glasova „za“).

Na osnovu rezultata glasanja konstatovano je da je Skupština jednoglasno donijela Odluku o proširenju djelatnosti Javne ustanove Srednja škola za tekstil, kožu i dizajn Sarajevo na djelatnost obrazovanja odraslih, (s 28 glasova „za“).

Realizacija tačke sedam.

AD-7.

PRIJEDLOG ODLUKE O PROŠIRENJU DJELATNOSTI JAVNE USTANOVE SREDNJA ZUBOTEHNIČKA ŠKOLA SARAJEVO NA DJELATNOST OBRAZOVANJA ODRASLIH

Zastupnici su materijal dobili uz poziv za sjednicu i smatrali su da nije potrebno uvodno izlaganje predlagača.

Obzirom da nije bilo prijavljenih za diskusiju, predsjedavajući je predložio da se u skladu sa članom 94. Poslovnika Skupštine Kantona Sarajevo o ovoj tački odmah izjašnjava, što su zastupnici jednoglasno podržali, (s 29 glasova „za“).

Na osnovu rezultata glasanja konstatovano je da je Skupština jednoglasno donijela Odluku o proširenju djelatnosti Javne ustanove Srednja zubotehnička škola Sarajevo na djelatnost obrazovanja odraslih, (s 29 glasova „za“).

Realizacije tačke osam.

AD-8.

IZVJEŠTAJ O RADU FONDA KANTONA SARAJEVO ZA STIPENDIRANJE I ŠKOLOVANJE DJECE BORACA, POGINULIH BORACA I POGINULIH CIVILA-ŽRTAVA RATA „IKRE“ SA IZVJEŠTAJEM O FINANSIJSKOM POSLOVANJU ZA 2024. GODINU

Materijal je dostavljen uz poziv za sjednicu. Zastupnici su smatrali da nisu potrebne uvodne napomene predlagača. Nije bilo prijavljenih za diskusiju.

Na osnovu rezultata glasanja konstatovano je da je Skupština jednoglasno usvojila o Izvještaj o radu Fonda Kantona Sarajevo za stipendiranje i školovanje djece boraca, poginulih boraca i poginulih civila- žrtava rata „IKRE“ sa izvještajem o finansijskom poslovanju za 2024. godinu, (s 29 glasova „za“).

Na kraju je predsjedavajući konstatovao da su iscrpljenje sve tačke dnevnog reda i zaključio rad na 26. Radnoj sjednici Skupštine, zahvalivši se zastupnicima.

Broj: 01-04-52465/25
14.11.2025.godine
SARAJEVO

Zapisnik izradila:

Lejla Kadrić

S E K R E T A R

P R E D S J E D A V A J U Ć I

SKUPŠTINE KANTONA SARAJEVO

SKUPŠTINE KANTONA SARAJEVO

Aida Zeković

Elvedin Okerić

- 0 -

Sastavni dio ovog zapisnika su stenografske bilješke, audio snimak sjednice, koji se čuvaju u Službi za skupštinske poslove Skupštine Kantona Sarajevo.